

蓮宗寶鑑

瑪璫經
房印造

風陵文庫

文庫19

F223

/



廬山東林禪寺蓮宗善法祖堂勸修淨業臣僧
普度謹自編集蓮宗寶鑑一部發明佛祖念佛
三昧已蒙諸尊宿善知識題跋印證來詣大都
禮拜

罽賓國公班的荅師父主盟佛法得奉法旨教
般若室利長老賢耶那室利闍羅羅司丞於至
大元年十月十一日至隆福宮

今上皇帝潛龍時分月海怯辭第一日親捧蓮宗寶
鑑啟奉

令旨教刊板印行者敬此卽於大都明理不花丞

蓮宗寶鑑序
相施到

無量壽法王寺內鏤板已遂畢工。所集洪因。端
爲祝延

皇帝聖壽萬安。

皇太后皇后齊年。

太子諸王千秋。文武官僚高增祿位。

皇圖永固。佛日增輝。凡日見聞。同成佛道。

皇慶壬子正月四日優曇普度謹識

古之下。所謂廬山蓮宗寶鑑者。豈徒言哉。宿師
名德。公大人跋讚品題。備於卷末。後之修淨
業者。披閱是集。洞明佛祖旨趣。宏揚斯道。垂之
無窮。其功詎可比量也耶。延祐改元甲寅孟夏。
前癸之明智崇勝禪寺比丘大中德合再拜爲
之敘云

蓮宗寶鑑序
所謂念佛三昧者。梵語佛陀。此云覺者。自覺覺他。覺行圓滿。故名曰佛。如睡夢覺。如蓮華開。爲令有情。返照回光。淨念相繼。久久純熟。惑盡障除。一念不生。前後際斷。悟此覺性。內無能念之心。外無所念之境。能所兩忘。生佛無二。故曰念佛。梵語三昧。此云正定。謂思專想寂。神智明妙也。經云。若念佛者。當知此人。則是人中芬陀利華。東晉遠公祖師。因聽彌天法師講般若經。豁然大悟。入於無量甚深三昧。遊止廬山。與高僧朝士結緣修行。故云諸教三昧。其名甚衆。功高

易進。念佛爲先。因以蓮宗名其社焉。師乃著念佛三昧叙。蓋發揚此理也。天台智者判教。謂觀無量壽經。爲大乘終實之教。以三觀澄心者。蓋顯念佛之旨也。法照尊者。禮文殊而求指。蓋指此法也。省常禪師。結淨行緣。宰相名卿。皈嚮同修者。蓋此道也。長蘆蹟禪師。結蓮華勝會。感普賢普慧二菩薩入會。蓋證明此道也。慈照宗主。以本願力。示現世閒。發廣度心。引權就實。隨機化導。蓋欲令利根鈍根。俱悟此道也。集白蓮懺。開四土圖。以信行願爲資糧。以戒定慧爲樞要。

蓮宗寶鑑序
蓋立此念佛正宗也。宋高宗御書蓮社二字。蓋崇此法門也。欽惟

大元普天一統。諸國來朝。人心樂善。廬山東林禪寺。東巖圓應日禪師。欽奉

聖旨。住持道場。修營梵宇。集諸賢傅。乃追古而整宗。綱架大法。橋復振今。而開祖道。一十八載。提唱宗乘之外。常以念佛三昧。開導人天。至元壬辰秋。赴慶元路育王山廣利禪寺。請而遜席于開先悅堂。閻禪師相繼住持。元貞元年正月。述明居士燕覺。道破衣和尚。欽奉

聖旨。勅明蓮宗善法堂護持教法。元貞二年正月。又

聖旨。賜通慧大師。蓮社正宗。仍賜金襴袈裟。於大德五年十月。欽奉

聖朝頒降

御香金旛到寺。自晉至今。僅乎千載。感斯恩耀。遐方異域。若賢若愚。皆從化焉。悉以齊心念佛。仰祝皇帝聖壽萬安。天下太平。法輪常轉。熙熙然舜日堯風。卽此世界爲極樂世界也。普度濫叨釋裔。無補教門。嘗見稱蓮宗者。未諳念佛旨趣。棄本逐

末著相修行。淨業正因。逮將沉沒。皆是懷寶迷
邦。背真向偽。從其事者。紛如牛毛。具正見者。尠
若麟角。致令上慢之徒。輕忽吾佛之道。悲夫。去
古時遙。法久成弊。正道湮微。邪法增熾。人多錯
解。蹉入邪途。不思淨土一門。乃出輪迴之捷徑。
其直如弦。其朗如日。奧旨在於經懺之間。不遇
明師啟迪。猶若羣盲摸象。各說異端。從冥入冥。
永纏邪見。可痛惜哉。矧今恭遇
佛心天子。正法治世。廼

君臣慶會之時。政佛法流通之際。得不以祖師念佛

三昧。開示人天。用作將來眼目。俾同悟入。佛知
見哉。予乃翹心淨土。採蹟先宗。編集要言。目曰
寶鑑。照明真偽。凡一十篇。其首曰念佛正因。謂
入室必由戶也。次曰正教。乃示念佛法門。漸偏
頓圓。使進修者。隨根器而歸乎至道也。又其次
曰正宗。蓋示念佛三昧。正心之理。俾修習者。明
其宗而達其本也。又其次曰正派。蓋明佛祖暨
諸宗師。得道之本末。欲令後學。知有其自也。又
其次曰正信。正行。正願。俾信正法。修正行。發正
誓。而求生西方也。次曰往生正訣。蓋示臨終生

蓮宗寶鑑序
淨土之路也。次曰正報。蓋明修行所得淨土依
正之功德莊嚴也。次曰正論。蓋引諸佛誠言。破
羣邪異見。欲令改不善而從善也。非敢有助於
宗風。爲益於未聞者也。欲其枉者直之。邪者正
之。疑者決之。迷者悟之。盡大地人。於一念中。同
得念佛三昧。共證菩提。不亦偉歟。修淨業者。無
恹慈悲。試一展卷。見聞隨喜。讚輔流通。其如佛
祖未出世一句子。請高着眼。時大德九年乙巳
彌陀示相日。江州廬山東林禪寺蓮宗善法堂
主僧優曇普度齋沐謹題。

序

夫心性役乎塵勞煩惱。而不爲塵勞煩惱之所
汨沒。如蓮生淤泥。而不因淤泥染汚其質。故直
指之爲蓮也。心性通乎三乘諸法。而不爲三乘
諸法之所陵奪。由宗分支派。而不因支派忘失
其本。故念佛之爲宗也。心性虛空。含育萬有。譬
海中四珠。出無盡藏。故標之爲寶也。心性明淨。
照了色象。喻一鏡當臺。能辨妍醜。故名之爲鑑
也。優曇和尚。浙之丹陽蔣氏。家世事佛。積善生
而敏銳。弱冠則厭俗緣。投簪薙髮。初參龍華寶

山慧禪師。一見器之。誠其歷叩諸老之門。琢磨
淘汰。達心淨土。見性彌陀。深惜祖道湮微。述集
念佛警要。目之曰蓮宗寶鑑。言言破惑。并并有
條。天童東巖圓應。禪師見而證之。曰善哉善
哉。如是如是。繼之京都。開法於法王禪寺。道合
灌頂國師。捧寶鑑而上奏。
金輪與正宗而下頌。
玉旨忘軀爲法。異世龜鑑。開導人天。續佛慧命。實僧
中寶。正本齊末。統衆歸宗。不捨悲願。融真混俗。
示火中蓮。振復東林。遠公祖師已墜之風。於千

廬山蓮宗寶鑑目次

念佛正因篇第一

念佛正因說 下具三章

阿彌陀佛因地

彌陀釋迦本願因地

佛爲韋提希聖后說淨業正因

孝養父母 奉事師長 慈心不殺 發菩提心
修十善業 受持三皈 具足衆戒 讀誦大乘
深信因果 勸進行者

念佛正教篇第二

念佛正教說 下具七章

佛爲父王說念佛

善財參見德雲比丘說念佛門

智首菩薩說念佛

龍樹大士說念佛

念佛功德有七種勝

修持法門

離相念佛三昧無住法門

空觀念佛三昧無念法門

日觀念佛三昧專想法門

參禪念佛三昧究竟法門

攝心念佛三昧調息法門

一相念佛三昧專念法門

六時念佛功德回向法門

懺罪念佛功德繫念法門

甘念佛功德信願法門

慈照宗主圓融四土

念佛正宗篇第三

念佛正宗說

下具
八章

定明宗體

李長者華嚴合論十種淨土權實

念佛參禪求宗旨說

淨土非鈍根權說

真歇了禪師淨土宗要

寂室大師示淨土實見

大智律師示念佛事理不二

文法師淨行念佛宗要

念佛正派篇第四

念佛正派說

下具二章

遠祖師事實

遠祖師歷朝諡號

明教大師題遠祖師影堂記

廬山十八大賢名氏

貫休禪師題十八賢影堂記

辯明遠祖師成道事

壁谷曇鸞大師

天台智者大師

京師善導和尚

金臺法照大師

睦州少康法師

省常大師

長蘆慈覺禪師

永明壽禪師

天竺慈雲懺主

文潞公傳

示念佛人發願潞府宗坦疏主

慈照宗主

示念佛人發願無為子楊提刑

龍舒居士王虛中

儀真王侍郎

念佛正信篇第五

念佛正信說

下具五章

斷疑生信

勸發信心

慈雲式懺主往生正信偈

智者大師淨土十疑論敘

提刑直指淨土決疑序

念佛正行篇第六

念佛正行說

下具十章

修進工夫

資生助道

作福助緣

去惡取善

拔濟幽趣

放諸生命

六度萬行齊修

維摩大士示淨土八法

較明修行難易

天台示淨土忻厭二行門

淨業道場

自行化他

以事檢心

念佛正願篇第七

念佛正願說

下具六章

勸發大願

心照宗主示念佛人發願偈并序

求生淨土要在發願

善導和尚修行發願儀

白侍郎發願求生

馮濟川施經發淨土願文

念佛往生正訣篇第八

念佛往生正訣說

下具十章

父母臨終往生淨土

臨終三疑

臨終四關

臨終決疑撮要

僧濟臨終注想西方

善導和尚臨終往生正念文

化佛來迎

賢首菩薩臨終讚念佛偈

情想多少論報高下

命終善惡感報優劣

臨終十事不尅念佛勉勸預修

念佛正報篇第九

念佛正報說 下具四章

功德莊嚴

淨土增修聖果

淨土三十益

淨土成佛

念佛正論篇第十

念佛正論說 下具二十三章

真如本性說

辨真妄身心

辨明三寶

辨見聞覺知

破妄說災福

辨明空見

辨一合相

辨明雙修

辨明三車

辨明三關

辨明大小二乘

辨明不生不滅

辨明曹溪路

辨佛法隱藏

辨明超日月光

辨明髻中珠

辨明無漏果

辨明趙州茶

辨明教外別傳

辨關閉諸惡趣門開示涅槃正路

辨明四生

破妄立十號

誓願流通

優曇和尚事實 附

廬山蓮宗寶鑑目次終

比丘允清 妙具 各助洋壹元

了瑞 助錢千四百文

從蘊 助錢五百文

信女王氏妙一助洋壹元同刻序文目錄餘資印送

廬山蓮宗寶鑑卷一

東林蓮宗善法祖堂勸修淨業臣僧普度謹編

念佛正因篇第一

念佛正因說下具三章

蓋聞恆河沙數衆如來。彌陀第一。十方微塵諸佛刹。極樂是歸。至理本祇唯心。初門必由因地。故知合抱之木。發於毫芒。千里之行。始於初步。欲超生死。以淨土爲歸趣之方。將證涅槃。故念佛乃正心之要。深信極樂。眞解脫之妙門。諦想彌陀。實衆生之慈父。先明落處。故望果以修因。漸履玄途。是從因而至果。故知

集羣賢而結社。有其旨焉。專念佛以勸人。與其教也。因該果海。果徹因源。形直無不影端。聲和自然響順。勢至示證圓通之要。世尊說修淨業之因。從聞思修。登三摩地。憑信行願。入法界門。是以一念興而萬靈知。信心生而諸佛現。纔稱寶號。已投種於蓮胎。一發菩提。卽標名於金地。有緣斯遇。自悟自修。淺信不持。大愚大錯。故云一乘極唱。終歸獲至於樂邦。萬行圓修。最勝獨稱於寶號。八十億劫之重罪。廓爾煙消。十萬億刹之遐方。倏如羽化。想念專注。卽觀心而見佛身。心境交參。卽因門而成勝果。十方淨穢。卷舒同在。

於毫端。一性包融。浩博該羅於法界。是則諸佛與衆生交徹。淨土與穢土冥通。彼此互修。事理無礙。若神珠之頓含衆寶。猶帝網之交映千光。我心旣然。生佛同爾。是知遊神億刹。實生乎自己心中。孕質九蓮。豈逃於刹那際內。二乘賢輩。回心卽達於金池。五逆凡夫。十念便登於寶界。嗟乎。識昏障重。信寡疑多。貶淨業爲權乘。嗤誦持爲麤行。豈非耽溺火宅。自甘永劫之沉迷。悖悞慈親。深痛一生之虛喪。須信非憑他力。截業惑以無由。不遇此宗。出生死而無路。誓同諸佛。敢儆前修。勸勉後賢。深崇此道。已發願。今發願。當發

蓮宗寶鑑卷一
願事事而回向彌陀。若已生。若今生。若當生。念念而皆歸淨土。欲取一生事辦。便於這裏留心。一切時中。千車合轍。四威儀內。萬善同歸。齊登極樂妙門。速成念佛三昧。最初一步要分明。直至西方無異路。

阿彌陀佛因地

正因

鼓音王經云。過去劫中有國名妙喜。王名憍尸迦。祖父清泰國王。父月上轉輪王。母殊勝妙顏。生三子。長曰月明。次曰憍尸迦。三曰帝衆。時有一佛出世。名曰世自在王。憍尸迦心發道意。棄捨國位。投佛出家。號曰法藏比丘。又大彌陀經云。法藏比丘於世自在王

佛所發無上意。一切世間無能及者。時佛說一百一十億諸佛刹土。應其心願。法藏稽首禮佛。廣說四十八願。若不爾者。誓不成佛。是時大地震動。天雨妙華。空中同聲讚言。決定成佛。

第一願。設我得佛。國有地獄。餓鬼。畜生者。不取正覺。第二願。設我得佛。國中天人。壽終之後。復更三惡道者。不取正覺。第三願。設我得佛。國中天人。不悉眞金色者。不取正覺。第四願。設我得佛。國中天人。形色不同。有好醜者。不取正覺。第五願。設我得佛。國中天人。不識宿命。下至知百千億那由他諸劫事者。不取正

覺第六願。設我得佛。國中天人不得天眼。下至見百千億那由他諸佛。國者不取正覺。第七願。設我得佛。國中天人不得天耳。下至聞百千億那由他諸佛所說。不悉受持者。不取正覺。第八願。設我得佛。國中天人不得見他心智。下至知百千億那由他諸佛國中衆生心念者。不取正覺。第九願。設我得佛。國中天人不得神足。於一念頃。下至不能超過百千億那由他諸佛。國者不取正覺。第十願。設我得佛。國中天人若起想念。貪計身者。不取正覺。第十一願。設我得佛。國中天人不住定聚。必滅度者。不取正覺。第十二願。設

我得佛。光明有限量。下至不照百千億那由他諸佛國者。不取正覺。第十三願。設我得佛。壽命有限量。下至百千億那由他劫者。不取正覺。第十四願。設我得佛。國中聲聞。有能計量。乃至三千大千世界衆生。悉成緣覺。於百千劫。悉共計校。知其數者。不取正覺。第十五願。設我得佛。國中天人。壽命無能限量。除其本願。修短自在。若不爾者。不取正覺。第十六願。設我得佛。國中天人。乃至聞有不善名者。不取正覺。第十七願。設我得佛。十方世界。無量諸佛。不悉咨嗟。稱我名者。不取正覺。第十八願。設我得佛。十方衆生。至心信

樂。欲生我國。乃至十念。若不生者。不取正覺。唯除五
逆。誹謗正法。第十九願。設我得佛。十方衆生。發菩提
心。修諸功德。至心發願。欲生我國。臨壽終時。假令不
與大衆圍遶。現其人前者。不取正覺。第二十願。設我
得佛。十方衆生。聞我名號。繫念我國。植衆德本。至心
回向。欲生我國。不果遂者。不取正覺。第二十一願。設
我得佛。國中天人。不悉成滿。三十二大人相者。不取
正覺。第二十二願。設我得佛。他方佛土。諸菩薩衆。來
生我國。究竟必至。一生補處。除其本願。自在所化。爲
衆生故。被宏誓鎧。積累德本。度脫一切。遊諸佛國。修

菩薩行。供養十方諸佛。如來開化恆沙無量衆生。使
立無上。正眞之道。超出常倫諸地之行。現前修習普
賢之德。若不爾者。不取正覺。第二十三願。國中菩薩。
承佛神力。供養諸佛。一食之頃。不能徧至。無數無量
億。那由他諸佛國者。不取正覺。第二十四願。設我得
佛。國中菩薩。在諸佛前。現其德本。諸所求欲。供養之
具。若不如意者。不取正覺。第二十五願。設我得佛。國
中菩薩。不能演說。一切智者。不取正覺。第二十六願。
設我得佛。國中菩薩。不得金剛那羅延身者。不取正
覺。第二十七願。設我得佛。國中天人。一切萬物。嚴淨

光麗形色殊特。窮微極妙。無能稱量。其諸衆生。乃至逮得天眼。有能明了。辨其名數者。不取正覺。第二十八願。設我得佛。國中菩薩。乃至少功德者。不能知見其道場樹。無量光色。高四百里者。不取正覺。第二十九願。設我得佛。國中菩薩。若受讀經法。諷誦持說。而不得辯才智慧者。不取正覺。第三十願。設我得佛。國中菩薩。智慧辯才。若可限量者。不取正覺。第三十一願。設我得佛。國土清淨。皆悉照見。十方一切無量無數。不可思議。諸佛世界。猶如明鏡。覩其面像。若不爾者。不取正覺。第三十二願。設我得佛。自地以上。至

於虛空。宮殿樓觀。池流華樹。國土所有一切萬物。皆以無量雜寶。百千種香。而共合成。嚴飾奇妙。超諸天人。其香普熏。十方世界。菩薩聞者。皆修佛行。若不如是。不取正覺。第三十三願。設我得佛。十方無量。不可思議。諸佛世界。衆生之類。蒙我光明。觸其身者。身心柔軟。超過天人。若不爾者。不取正覺。第三十四願。設我得佛。十方無量。不可思議。諸佛世界。衆生之類。聞我名字。不得菩薩無生法忍。諸深總持者。不取正覺。第三十五願。設我得佛。十方無量。不可思議。諸佛世界。其有女人。聞我名字。歡喜信樂。發菩提心。厭惡女

蓮宗寶鑑卷一
身壽終之後復爲女像者不取正覺第三十六願設
我得佛十方無量不可思議諸佛世界諸菩薩衆聞
我名字壽終之後常修梵行至成佛道若不爾者不
取正覺第三十七願設我得佛十方無量不可思議
諸佛世界諸天人人民聞我名字五體投地稽首作禮
歡喜信樂修菩薩行諸天世人莫不致敬若不爾者
不取正覺第三十八願設我得佛國中天人欲得衣
服隨念卽至如佛所讚應法妙服自然在身有求裁
縫擣染浣濯者不取正覺第三十九願設我得佛國
中天人所受快樂不如漏盡比丘者不取正覺第四

十願設我得佛國中菩薩隨意欲見十方無量嚴淨
佛土應時如願於寶樹中悉皆照見猶如明鏡覩見
面像若不爾者不取正覺第四十一願設我得佛他
方國土諸菩薩衆聞我名字至於得佛諸根缺陋不
具足者不取正覺第四十二願設我得佛他方國土
諸菩薩衆聞我名字皆悉逮得清淨解脫三昧住是
三昧一發意頃供養無量不可思議諸佛世尊而不
失定意若不爾者不取正覺第四十三願設我得佛
他方國土諸菩薩衆聞我名字壽終之後生尊貴家
若不爾者不取正覺第四十四願設我得佛他方國

土。諸菩薩衆。聞我名字。歡喜踴躍。修菩薩行。具足德本。若不爾者。不取正覺。第四十五願。設我得佛。他方國土。諸菩薩衆。聞我名字。皆悉逮得。普等三昧。住是三昧。至於成佛。常見無量。不可思議。一切諸佛。若不爾者。不取正覺。第四十六願。設我得佛。國中菩薩。隨其志願。所欲聞法。自然得聞。若不爾者。不取正覺。第四十七願。設我得佛。他方國土。諸菩薩衆。聞我名字。不即得至。不退轉者。不取正覺。第四十八願。設我得佛。他方國土。諸菩薩衆。聞我名字。不即得至。第一忍第二第三法忍。於諸佛法。不能即得。不退轉者。不取

正覺。

阿彌陀佛四十八願

彌陀釋迦本願因地二正因

悲華經云。往昔劫中。有轉輪王。名無諍念。大臣寶海。爲善知識。同於寶藏佛所。發菩提心。無諍念發願云。我修大乘。取於淨土。終不願於穢土。成阿耨多羅三藐三菩提。世界衆生。無諸苦惱。我不得如是佛刹。爾乃不成正覺。今既果滿。號阿彌陀。故現淨土。寶海大臣。願於穢土。成熟有情。今已果滿。號釋迦牟尼。於此濁惡世中。成佛菩提。

佛爲韋提希聖后說淨業正因三正因

觀無量壽佛經云。爾時韋提希號泣向佛。白言世尊。惟願爲我。廣說無憂惱處。我當往生。不樂閻浮。濁惡世也。爾時世尊。放眉間光。徧照十方。無量世界。諸佛國土。皆於中現。時韋提希見已。白佛言。是諸佛土。雖復清淨。皆有光明。我今樂生極樂世界。阿彌陀佛所。惟願世尊。教我思惟。教我正受。佛告韋提希。阿彌陀佛。去此不遠。汝當繫念。諦觀彼國。我今廣爲汝說。亦令未來凡夫。修淨業者。得生西方。極樂國土。欲生彼國者。當修三福。一者孝養父母。奉事師長。慈心不殺。修十善業。二者受持三歸。具足衆戒。不犯威儀。三者發菩提心。深信因果。讀誦大乘。勸進行者。如此三事。名爲淨業。正因。佛告阿難。及韋提希。諦聽諦聽。善思念之。

孝養父母

念佛乃諸法之要。孝養爲百行之先。孝心卽是佛心。孝行無非佛行。欲得道同諸佛。先須孝養二親。故蹟禪師云。孝之一字。衆妙之門。佛語以孝爲宗。佛經以孝爲戒。言中不昧。口出戒光。直下分明。頓開心地。夫孝者。有在家之孝。有出家之孝。在家孝者。父母愛之。喜而不忘。父母惡之。勞而不怨。承順顏色。以盡養生。

出家孝者。割愛辭親。食微契本。深入無爲之理。上酬罔極之恩。趣解脫之要途。報慈親之捷徑。非但未來獲益。亦於現世成功。所以如來子夜踰城。道圓雪嶺。盧能白金遺母。法繼黃梅。然而以法斷恩。應思報德。是以迦維省父。忉利甯親。至於貧乏無依。理合躬親給侍。是故畢陵迦起盡心之戒。忍大師有養母之堂。陳睦州織屨供親。朗法師荷擔遊學。然則出家者。以法味爲甘旨。不忘返哺之心。以佛事爲勤勞。未遺世諦之禮。非但一世父母。而多生父母皆報。不惟一身父母。而法界父母皆度。同登覺岸。豈止周公之配天。

普示迷津。故逾考叔之純孝。出家之孝。其利溥哉。如或因緣未和。父母不聽。宜盡在家之孝。勸修出世之因。若能卽俗而真。亦有成佛之路。覲反嬰兒之行。無虧膝下之嚴。報雙親顧復之勞。致一乘圓滿之地。遂使在家菩薩。行解無疑。出俗高人。因斯可鑑。其有局於事佛。不能盡於事親。覩茲有感於中。可以克全其孝。嗚呼。光陰易往。父母難忘。有親在堂。如佛在世。以此報親之德。圓成念佛之功。是知父母喜懽。則諸佛喜懽。此心清淨。則佛土清淨。可謂野色更無山隔斷。月光直與水相連。

奉事師長

古德云。生我者父母。成我者師友。是知師者。迷途之明導。暗室之慧燈。苦海之舟航。人天之眼目。恩逾父母。德重乾坤。弟子所以事師。不敢慢易也。豈不見捨全身而求半偈。斷一臂而扣真乘。以身爲座而奉師。腰石負春而續祖。賣心肝而學般若。投火聚以證菩提。方之古人。深爲慶幸。奉師學道。可不勉哉。應知出世投師。須求正見。參方請益。莫附邪宗。要明罪福之因由。審辨正邪之利害。正則成佛。邪則成魔。打頭不遇作家。到老翻成骨董。是以如來知師非而捨去。夫

掉善者而從之。觀古聖之如斯。何今人而不爾。況當未運。多有邪師。凡欲修行。切莫親近。但存正念。終值明師。要了大緣。慎勿容易。是故弟子事師。卽同事佛也。可謂四事供養。敢辭勞。萬兩黃金亦消得。

慈心不殺

卵胎溼化。飛走蟲魚。皆未來諸佛之流。或過去多生父母。至於喁喁怖死。汲汲貪生。避苦而樂其身。此情一等。求安而養其命。斯理萬均。何乃聲哀哀而牽上刀砧。眼盼盼而驅就死地。或張羅亘野。布網連山。火逐嶺以高低。煙隨處而疎密。疾電之鷹爭舉。追風之

蓮宗寶鑑卷一
馬競前猿覩箭以魂飛。雁看弓而膽落。解頭陷腦之
酸難抵。洞胸徹骨之痛奚禁。况斯等共稟五行。俱含
四象。同沾佛性。共有神明。何乃陳此肉山。樹茲炮烙。
充其口腹。美彼心肝。殊不知斷其命者。是出佛身之
血。食其肉者。甯非父母之身。造殺害之深尤。斷慈悲
之種性。生前福壽。暗裡消磨。死後沉淪。刀山劍樹。還
作雞猪魚兔。次第填償。至於宰割烹炮。因果相似。諦
觀食肉。可謂寒心。縱售易於屠門。亦難逃於重罪。菩
薩甯當破骨。終不食噉衆生。是以白兔焚身。而仙人
不顧也。草尚不拔。肉豈容嘗。遠彼庖廚。有聞聲不忍
之訓。養他出賣。同口殺心。食之尤大。聖垂慈。所以制
戒。永斷殺生。其德大也。修淨土人。故當持守。可謂不
貪香餌味。始是碧潭龍。

修十善業

夫大乘玄要。元不離於一心。淨業正因。必先修於十
善。斷身口七重之罪。七行斯成。滅意識三毒之根。三
學自備。彌陀經內。求淨土者之所當修。華嚴經中。離
垢地者。乃能親證。人天至於有頂。以十善爲受生之
緣。聲聞以至佛乘。由十善爲入道之本。弗遵佛制。墮
三塗之要門。縱得人身。獲二種之惡報。不修乃十不

善道奉持爲十戒法門。實乃淨土磁基。普勸常修此
行是菩薩之法苑。宜令安住其中。可以至無畏大城。
可以登不退轉地。功德詎可思量。佛子所以當學。

受持三歸

佛爲三界大師。法是羣生眼目。僧乃六和上士。並爲
眞淨福田。背之則邪。順之則正。神功莫並。聖力難思。
除苦如藥。鼓落鏃。脫難若雙劍。突圍變苦爲樂。而刹
那革凡成聖。而頃刻。是以火車相現。皈依而便獲清
涼。地獄將臨。稱念而悉皆離苦。普明與諸王免難。空
定功焉。帝釋卻頂生之威。般若力也。所以信心佛子。

皈依三寶。眞慈香花供養於佛僧。讀誦流通於法寶。
集茲善利。回向善提。普暨衆生。同生淨土。不見道。頻
伽鸚鵡。稱念而得生西方。諸天帝王。欽敬而誓求聖
道。皆能上成佛果。下脫苦輪。可謂禪是大瀉。詩是朴
大唐天子只三人。

具足衆戒

既發菩提心。應修菩薩行。初受三皈。次持五戒。漸修
十種善法。圓滿三聚律儀。根熟則全持。根生則分受。
年有三善。月有六齋。如或五戒難行。且除酒肉二味。
十重易犯。且持不殺一門。輕塵積獄。墜露添流。一滴

下崖終歸大海。故涅槃經云。佛在世日。以佛爲師。佛滅度後。以戒爲師。梵網經云。戒如淨明月。亦如瓔珞珠。微塵菩薩衆。由是成正覺。所以龍無犯殺之心。狼有持齋之意。比丘苦節。至於繫草護鵝。居士病緣。終不飲酒食肉。是知諸善之本。五戒爲先。王者履之以治國。君子奉之以立身。不可造次而離。不可須臾而廢。佛稱五戒。儒謂五常。在天爲五星。在地爲五嶽。在人爲五藏。在處爲五方。廣而言之。無所不統。仰觀俯察。莫能加焉。故法苑珠林云。世俗所尚。仁義禮智信也。貪識所資。殺盜淫妄酒也。道俗雖乖。漸教通也。正

法內訓。必始於因。此則在乎實法。指事直言。不假飾辭。託名現意。如斯而修。因不期果。而果證從茲而入。道不羨樂。而樂彰。今見持戒不殺。不求仁而仁著。守戒不盜。不忻義而義敷。不姪者不祈禮。而禮立。不妄者不慕信。而信揚。不飲者不行智。而智明。非但律已防非。亦以助國揚化。欲修成於淨行。須嚴護於戒根。可謂萬善和融。同佛土。熙熙長樂太平時。

發菩提心

無上佛果。名曰菩提。若發此心。決定成佛。淨行法門曰。凡修淨土。須善發心。若爲自己。厭五濁。忻九品。則

違菩提心。是聲聞行。不應發也。若爲衆生起大悲心。求往彼國。希速成就。道力神通。徧歷十方。救度一切。令共成佛。則順菩提心。是菩薩行。應當發也。今勸淨業高流。凡欲利己利他。須是發心。立志應於三寶前。虔奉香花。志心發願云。南無佛。南無法。南無僧。弟子某。從於今日。發此大心。不爲自求。人天福報。聲聞緣覺。乃至權乘。諸位菩薩。唯依最上乘。發菩提心。唯願與現生父母。及多生父母。法界衆生。一切怨親。同生淨土。皆得不退轉於阿耨多羅三藐三菩提。如是三說。此心時時要發。日日常然。所以善財一生證果。龍女八歲成佛。地獄發心。頓超十地。沙彌發意。已越二乘。可謂一氣回元。運恩沾萬物深。

補錄蓮宗九祖省菴法師勸發菩提心文

不肖愚下。凡夫僧實賢。泣血稽顙。哀告現前大衆。及當世淨信男女等。唯願慈悲。少加聽察。嘗聞入道要門。發心爲首。修行急務。立願居先。願立則衆生可度。心發則佛道堪成。苟不發廣大心。立堅固願。則縱經塵劫。依然在輪回。雖有修行。總是徒勞辛苦。故華嚴經云。忘失菩提心。修諸善法。是名魔業。忘失尙爾。况未發乎。故知欲學如來乘。必先

蓮宗寶鑑卷一
具發菩薩願不可緩也。然心願差別其相乃多。若不指陳如何趣向。今爲大衆畧而言之。相有其八。所謂邪正真僞大小偏圓是也。云何名爲邪正真僞大小偏圓邪。世有行人一向修行。不究自心。但知外務。或求利養。或好名聞。或貪現世欲樂。或望未來果報。如是發心。名之爲邪。既不求利養名聞。又不貪欲樂果報。唯爲生死爲菩提。如是發心。名之爲正。念念上求佛道。心心下化衆生。聞佛道長遠。不生退怯。觀衆生難度。不生厭倦。如登萬仞之山。必窮其頂。如上九層之塔。必造其顛。如是發心。

名之爲真。有罪不懺。有過不除。內濁外清。始勤終怠。雖有好心。多爲名利之所夾雜。雖有善法。復爲罪業之所染污。如是發心。名之爲僞。衆生界盡。我願方盡。菩提道成。我願方成。如是發心。名之爲大。觀三界如牢獄。視生死如冤家。但期自度。不欲度人。如是發心。名之爲小。若於心外見有衆生。及以佛道。願度願成。功勳不忘。知見不泯。如是發心。名之爲偏。若知自性是衆生。故願度脫。自性是佛道。故願成就。不見一法離心。別有。以虛空之心。發虛空之願。行虛空之行。證虛空之果。亦無虛空之相。

蓮宗寶鑑卷一
可得如是發心。名之爲圓。知此八種差別。則知審察。知審察則知去取。知去取則可發心。云何審察。謂我所發心。於此八中。爲邪爲正。爲真爲僞。爲大爲小。爲偏爲圓。云何去取。所謂去邪去僞去小去偏。取正取真取大取圓。如此發心。方得名爲真正發菩提心也。此菩提心。諸善中王。必有因緣。方得發起。今言因緣。畧有十種。何等爲十。一者念佛重恩故。二者念父母恩故。三者念師長恩故。四者念施主恩故。五者念衆生恩故。六者念死生苦故。七者尊重已靈故。八者懺悔業障故。九者求生淨土

故。十者爲念正法得久住故。云何念佛重恩。謂我釋迦如來。最初發心。爲我等故。行菩薩道。經無量劫。備受諸苦。我造業時。佛則哀憐。方便教化。而我愚癡。不知信受。我墮地獄。佛復悲痛。欲代我苦。而我業重。不能救拔。我生人道。佛以方便。令種善根。世世生生。隨逐於我。心無暫捨。佛初出世。我尙沈淪。今得人身。佛已滅度。何罪而生末法。何福而預出家。何障而不見金身。何幸而躬逢舍利。如是思惟。向使不種善根。何以得聞佛法。不聞佛法。焉知常受佛恩。此恩此德。邱山難喻。自非發廣大心。行

菩薩道。建立佛法。救度衆生。縱使粉骨碎身。豈能酬答。是爲發菩提心第一因緣也。云何念父母恩。哀哀父母。生我劬勞。十月三年。懷胎乳哺。推乾去濕。嚙苦吐甘。才得成人。指望紹繼門風。供承祭祀。今我等既已出家。濫稱釋子。忝號沙門。甘旨不供。祭掃不給。生不能養。其口體。死不能導。其神靈。於世閒則爲大損。於出世又無實益。兩途既失。重罪甯逃。如是思惟。唯有百劫千生。常行佛道。十方三世。普度衆生。則不唯一生父母。生生父母。俱蒙拔濟。不唯一人父母。人人父母。盡可超昇。是爲發菩

提心第二因緣也。云何念師長恩。父母雖能生育我身。若無世閒師長。則不知禮義。若無出世師長。則不解佛法。不知禮義。則同於異類。不解佛法。則何異俗人。今我等粗知禮義。略解佛法。袈裟被體。戒品沾身。此之重恩。從師長得。若求小果。僅能自利。今爲大乘。普願利人。則世出世閒。二種師長。俱蒙利益。是爲發菩提心第三因緣也。云何念施主恩。謂我等今者。日用所需。並非已有。三時粥飯。四季衣裳。疾病所須。身口所費。此皆出自他力。將爲我用。彼則竭力躬耕。尙難餬口。我則安坐受食。猶

不稱心。彼則紡織不已。猶自艱難。我於安服有餘。甯知愛惜。彼則葦門蓬戶。擾攘終身。我則廣宇閒庭。優悠卒歲。以彼勞而供我逸。於心安乎。將他利而潤己身。於理順乎。自非悲智雙運。福慧二嚴。檀信沾恩。衆生受賜。則粒米寸絲。酬償有分。惡報甯逃。是爲發菩提心。第四因緣也。云何念衆生恩。謂我與衆生。從曠劫來。世世生生。互爲父母。彼此有恩。今雖隔世昏迷。互不相識。以理推之。甯無報効。今之披毛帶角。安知非昔爲其子乎。今之蠕動蝟飛。安知不曾爲我父乎。每見幼離父母。長而容貌

都忘。何況宿世親緣。今則張王難記。彼其號呼於地獄之下。宛轉於餓鬼之中。苦痛誰知。飢虛安訴。我雖不見不聞。彼必求拯求濟。非經不能陳此事。非佛不能道此言。彼邪見人。何足以知此。是故菩薩觀於螻蟻。皆是過去父母。未來諸佛。常思利益。念報其恩。是爲發菩提心。第五因緣也。云何念生死苦。謂我與衆生。從曠劫來。常在生死。未得解脫。人間天上。此界他方。出沒萬端。昇沈片刻。俄焉而天。俄焉而人。俄焉而地獄畜生。俄鬼黑門。朝出而暮還。鍊窟暫離。而又入。登刀山也。則舉體無完膚。

攀劍樹也。則方寸皆割裂。熱鐵不除。飢吞之。則肝腸盡爛。洋銅難療。渴飲之。則骨肉都糜。利鋸解之。則斷而復續。巧風吹之。則死已還生。猛火城中。忍聽叫嗥之慘。煎熬盤裏。但聞苦痛之聲。冰凍始疑。則狀似青蓮。藥結。血肉既裂。則身如紅藕。華開。一夜死生。地下每經萬遍。一朝苦痛。人間已過百年。頻煩獄卒疲勞。誰信閻翁教誡。受時知苦。雖悔恨以何追。脫已還忘。其作業也。如故鞭驢出血。誰知吾母之悲。牽豕就屠。焉識乃翁之痛。食其子而不。知文王尙爾。噉其親而未識。凡類皆然。當年恩愛。

今作冤家。昔日寇讐。今成骨肉。昔爲母而今爲婦。舊是翁而新作夫。宿命知之。則可羞可耻。天眼視之。則可笑可憐。糞穢叢中。十月包藏。難過膿血道裏。一時倒下。可憐少也。何知東西莫辨。長而有識。貪欲便生。須臾而老病相尋。迅速而無常。又至風火交煎。神識於中潰亂。精血既竭。皮肉自外乾枯。無一毛而不被針鑽。有一竅而皆從刀割。龜之將烹。其脫殼也。猶易神之欲謝。其去體也。倍難。心無常主。類商賈而處處奔馳。身無定形。似房屋而頻頻遷徙。大千塵點。難窮往返之身。四海波濤。孰計

別離之淚。我我積骨。過彼崇山。莽莽橫尸。多於大地。向使不聞佛語。此事誰見誰聞。未覩佛經。此理焉知焉覺。其或依前貪戀。仍舊癡迷。祇恐萬劫千生。一錯百錯。人身難得而易失。良時易往而難追。道路冥冥。別離長久。三途惡報。還自受之。痛不可言。誰當相代。與言及此。能不寒心。是故宜應斷生死流出。愛欲海。自他兼濟。彼岸同登。曠劫殊勛。在此一舉。是爲發菩提心。第六因緣也。云何尊重已靈。謂我現前一心。直下與釋迦如來。無二無別。云何世尊。無量劫來。早成正覺。而我等昏迷顛倒。尙

做凡夫。又佛世尊。則具有無量神通智慧功德莊嚴。而我等則但有無量業繫煩惱。生死纏縛。心性是一。迷悟天淵。靜言思之。豈不可耻。譬如無價寶珠。沒在淤泥。視同瓦礫。不加愛重。是故宜應以無量善法。對治煩惱。修德有功。則性德方顯。如珠被濯。懸在高幢。洞達光明。映蔽一切。可謂不孤佛化。不負已靈。是爲發菩提心。第七因緣也。云何懺悔業障。經言犯一吉羅。如四天王壽。五百歲墮泥犁中。吉羅小罪。尙獲此報。何況重罪。其報難言。今我等日用之中。一舉一動。恆違戒律。一殮一水。頻犯

口羅一日所犯亦應無量何況終身歷劫所起之
罪更不可言矣且以五戒言之十人九犯少露多
藏五戒名爲優婆塞戒尙不具足何況沙彌比丘
菩薩等戒又不必言矣問其名則曰我比丘也問
其實則尙不足爲優婆塞也豈不可愧哉當知佛
戒不受則已受則不可毀犯不犯則已犯則終必
墮落若非自愍愍他自傷傷他身口併切聲淚俱
下普與衆生求哀懺悔則千生萬劫惡報難逃是
爲發菩提心第八因緣也云何求生淨土謂在此
土修行其進道也難彼土往生其成佛也易易故

一生可致難故累劫未成是以往聖前賢人人趣
向千經萬論處處皆歸末世修行無越於此然經
稱少善不生多福乃致言多福則莫若執持名號
言多善則莫若發廣大心是以暫持聖號勝於布
施百年一發大心超過修行歷劫蓋念佛本期作
佛大心不發則雖念奚爲發心原爲修行淨土不
生則雖發易退是則下菩提種畊以念佛之犁道
果自然增長乘大願船入於淨土之海西方決定
往生是爲發菩提心第九因緣也云何令正法久
住謂我世尊無量劫來爲我等故修菩提道難行

能行難忍能忍。因圓果滿。遂致成佛。既成佛已。化緣周訖。入於涅槃。正法像法皆已滅盡。僅存末法。有教無人。邪正不分。是非莫辨。競爭人我。盡逐利名。舉目滔滔。天下皆是。不知佛是何人。法是何義。僧是何名。衰殘至此。殆不忍言。每一思及。不覺淚下。我爲佛子。不能報恩。內無益於己。外無益於人。生無益於時。死無益於後。天雖高不能覆我。地雖厚不能載我。極重罪人。非我而誰。由是痛不可忍。計無所出。頓忘鄙陋。忽發大心。雖不能挽回末運。於此時。決當圖護持正法於來世。是故偕諸善友。

同到道場。述爲懺摩。建茲法會。發四十八之大願。願願度生。期百千劫之深心。心心作佛。從於今日。盡未來際。畢此一形。誓歸安養。既登九品。回入娑婆。俾得佛日重輝。法門再闡。僧海澄清於此界。人民被化於東方。劫運爲之更延。正法得以久住。此則區區眞實苦心。是爲發菩提心。第十因緣也。如是十緣備識。八法周知。則趣向有門。開發有地。相與得此人身。居於華夏。六根無恙。四大輕安。具有信心。幸無魔障。况今我等。又得出家。又受具戒。又遇道場。又聞佛法。又瞻舍利。又修懺法。又值善友。

又具勝緣。不於今日發此大心。更待何日。唯願大衆。愍我愚誠。憐我苦志。同立此願。同發是心。未發者。今發。已發者。增長。已增長者。今令相續。勿畏難而退怯。勿視易而輕浮。勿欲速而不久長。勿懈怠而無勇猛。勿委靡而不振起。勿因循而更期待。勿因愚鈍而一向無心。勿以根淺而自鄙無分。譬諸種樹。種久則根淺而日深。又如磨刀。磨久則刀鈍而成利。豈可因淺勿種。任其自枯。因鈍弗磨。置之無用。又若以修行爲苦。則不知懈怠尤苦。修行則勤勞暫時。安樂永劫。懈怠則偷安一世。受苦多生。

况乎以淨土爲舟航。則何愁退轉。又得無生爲忍力。則何慮艱難。當知地獄罪人。尙發菩提於往劫。豈可人倫佛子。不立大願於今生。無始昏迷。往者既不可諫。而今覺悟。將來猶尙可追。然迷而未悟。固可哀憐。苟知而不行。尤爲痛惜。若懼地獄之苦。則精進自生。若念無常之速。則懈怠不起。又須以佛法爲鞭策。善友爲提攜。造次弗離。終身依賴。則無退失之虞矣。勿言一念輕微。勿謂虛願無益。心眞則事實。願廣則行深。虛空非大。心王爲大。金剛非堅。願力最堅。大衆誠能。不棄我語。則菩提眷屬。

從此聯姻。蓮社宗盟。自今締好。所願同生淨土。同見彌陀。同化衆生。同成正覺。則安知未來三十二相。百福莊嚴。不從今日發心立願而始也。願與大衆共勉之。幸甚幸甚。

深信因果

擬步玄途。洗心大道。深信世間因果。究明出世根源。將窮其源。必在其要。要在用者。其於心法乎。心也者。彌綸於萬行。會通於羣數。蓋以心無常法。乘善惡而迭用。以罪福爲影響。故因果不相違。是知涉境而動。謂之因。動而生識。謂之緣。緣起則有業。相隨有業。

則果報定矣。是以善行惡行。世間之因也。三界六道。九有四生。世間之果也。念佛法門。出世間之因也。九品化生。淨土成佛。出世間之果也。於上因果。心中明了。故不樂着世間之法。於出世間法。心行不違。念念不忘於淨土。心心不離於彌陀。何以知其然。如今是因。臨終是果。應知因實。果則不虛。夫善惡二輪。苦樂二報。皆三業所造。因緣所生。亦因所成。五果所攝。若一念心。瞋恚邪嫉。卽地獄業。慳貪不實。卽餓鬼業。愚癡闇蔽。卽畜生業。我慢貢高。卽修羅業。堅持五戒。卽人業。精修十善。卽天業。證悟人空。卽聲聞業。知緣性。

離。卽緣覺業。六度齊修。卽菩薩業。眞慈平等。卽佛業。若心淨則香臺寶樹淨刹化生。心垢則丘陵坑坎穢土受形。皆是等倫之果。能感增上之緣。是以離自心源。更無別體。維摩經云。欲得淨土。但淨其心。故知一切歸心。萬法由我。欲成淨果。但行淨因。又當知闡提邪見定應墮千劫泥犁。誹謗撥無。卽此是邪魔眷屬。觀報應之若是。如影如形。信因果之歷然。可驚可懼。所謂苦瓠連根苦。甜瓜徹蒂甜。

讀誦大乘

既慕西方。當求了義。暗中有寶。無燈照終不自知。古鏡埋塵。不揩磨豈能光顯。調和三業。體究一心。恭奉眞文。研味聖意。深入法源之底。洞探諸佛之機。理路豁通。心花發現。不見道。倚松之葛。上聳千尋。附托勝因。方能廣益。譬夫桂生高嶺。雲露方得滋其華。蓮出綠波。飛塵不能污其葉。雖蓮性自潔。而桂質本貞。良由所附者高。則微物不能累。所憑者淨。濁類不能沾。夫以卉木無知。尙猶資善而成至善。人倫有識。得不因心而證佛心。豈不聞智者誦法華。見靈山之未散圭峯。讀圓覺。忍心地以開通。達本情忘。普菴契華嚴之旨。應無所住。六祖悟般若之宗。觀先德而可遵。豈

今人而不學。可謂渡河須用筏。到岸不須船。

勸進行者

夫學佛初門。大悲是菩薩正轍。利他要行。勸進乃淨業勝因。晉社羣賢。願祈生於安養。十方海衆。忻出離於娑婆。痛嗟生死之難逃。堪歎無常之期速。可不景行前哲。導彼後昆哉。勸一人二人。以至多人。是佛門之法施。念一佛二佛。以至萬佛。趣樂土之玄猷。日課千聲佛名。積月至年。則有三十六萬聲佛。積而不怠。亦幾於佛地乎。日行小善一事。積月至年。則有三百六十善事。積而不怠。亦幾於君子乎。爲愚爲小人。而

不通懺悔。同禽獸者。良由不學。亦無勸進之人也。經言。若人以四天下七寶。供養佛及菩薩。緣覺聲聞。得福甚多。不如勸人念佛一聲。其福勝彼。此世尊之勸進也。語云。已欲立而立人。已欲達而達人。此夫子之勸進也。勉爾同盟。熏淘淨行。或正月五月九月爲一集。或半年一年三年爲一期。深植善根。普皆回向。常爲道侶。更互相資。一人退惰。則協力提攜。一人捨凡。則遞相照顧。雖不能宏教利物。亦可以溫故知新。豈不見施人一錢。人稱受惠。益人一語。彼豈無知。財施則濟一世之貧。食施則濟一日之命。法施則令人出

世其功德詎可比倫。財施如燈。止明一室。法施如日。徧照大千。恪法而不勸修。累劫沉於黑獄。推已而行。化導現生。則是阿彌。敢冀運慈。遞相勸發。以斯悲願。結此淨緣。拔滯溺之沉流。出輪迴之捷徑。齊登樂土。圖報佛恩。可謂末度者今度矣。

淨業弟子淨民 端玉共助洋拾元 福山助洋
兩元敬同刻第一卷願以此功德速往極樂國親
見阿彌陀如佛度一切

廬山蓮宗寶鑑卷一

廬山蓮宗寶鑑卷二

東林蓮宗善法祖堂勸修淨業臣僧普度謹編

念佛正教篇第二

念佛正教說

下具十
七章

法界本無衆生。衆生緣乎妄見。如來本無言教。言教爲乎有情。妄見者衆生之病。言教者衆生之藥。以藥治病。則病無不治。以言覺妄。則妄無不覺。凡夫日用而不知。如來之道鮮矣。故我能仁大覺。愍羣機之未悟也。於是仰推大慈。俯垂妙範。華嚴頓示。聲聞尙若盲聾。阿含委說。菩薩未蒙獲益。方等贊大。般若蕩空。

涅槃殊途同歸。法華普皆受記。於是羣經森列。偏贊西方。蓋以阿彌陀佛。願廣緣強。法尊理備。而然爾其教也。指佛國爲歸趣。華池寶地。勝妙莊嚴。令忻彼而厭此也。其理也。示彌陀卽自性。念念圓明。心心實相。如大海之混百川也。其行也。開示十六觀門。攝心妙境。了性相空。如明鏡之見面像也。其果也。九品次第。化生。普攝利鈍。登不退階。至無上之菩提道也。是故九界衆生。以無所得心。而修佛國妙行。不亦宜乎。如來出世之懷。於斯盡矣。偏贊之辭。有其旨焉。眞百千三昧之要門。乃一實境界之直道。論事儀。則懺六根。

雪三業。究宗旨。則空萬法。了一心。是謂超苦海之健舟。救急病之良藥。信斯道者。開本覺心。出五濁苦達眞淨土。了性彌陀。若明月之當空。似蓮華之出水。故蓮宗之教。以是名焉。楊無爲云。蓮者出乎淤泥。不捨衆生界也。處空無染。顯露清淨體也。華而有實。非魔境也。華實同時。因果一如也。華開蓮現。示權顯實也。華落蓮成。廢權立實也。一蓮生無量華。建立一切法也。十方同一華藏。示佛境無異也。蓮教之義。得非是歟。所以興慈運悲者。遊戲於常光之界。戒珠義海者。涵泳於解脫之淵。是以天龍護持。王臣致敬。古今不

墜其化。士民仰慕其風。非夫大悲願力。撫哀末習。其孰能臻此哉。是故龍樹論證之。晉賢社修之。天台判釋之。慈恩通贊之。慈照集而懺之。宗坦疏而解之。宿衲名儒。奉之者寶珠有集。高賢達士。修之者簡編有題。於戲大法下衰。去聖逾遠。事佛者衆。謀道者稀。競聲利爲己能。視流通爲兒戲。遂令法門凋瘵。教網傾頽。實賴後賢。克荷斯道。普冀亡軀爲法。潔已依師。欲達眞乘。須親教典。稟教乃能明理。明理然後修行。行願無虧。道果可證。故知耳聞目見。當依四法。以思修口誦心違。縱解千章。而何益。是乃心以教照。佛以念

持。非以戒防。罪以懺雪。道以實踐。動以禮行。近則期於立身揚名。遠則希於革凡成聖。發揮佛祖之道。捨我輩而誰歟。堅秉慧刀。裂開魔網。飲正法之甘露。伐邪見之稠林。避惡友如避虎狼。事良朋如事父母。謹守志節。毋退大心。正覺可遵。非道莫履。有過務速改。有善勿矜誇。自然與禍斯違。與福斯會。現居塵世。則人敬之。天祐之。他日淨方。則聖可期。道可至。豈在乎相形問命。諂求榮達之時。又何必望影瞻光。卜度終歸之日。此匪道人之見識。實乃凡庸之妄情。莫徇他求。但依本分。在當仁而不讓。宜見賢以思齊。名利不

足動於懷。死生不足勞其慮。欲功成而志遂。必自邇而涉遐。當驗果以推因。信有作而有報。智足以照惑。明足以燭幽。言斯可法。行斯可樂。德義可尊。進退可度。辯偽識真。若試金之美石。除昏鑿物。猶照世之真燈。是大導師。作不請友。擲出龍宮之寶。均施羣生。撤開祖門之關。普容來者。蠲滌邪病。指歸妙源。俾昏鏡以重磨。若垢衣而再淨。使真風復振。福及大千。覩慧日增明。輝騰萬古。可謂法王之真子。可謂大丈夫焉。以此而奉西方大聖人之教者。復何愧歟。

佛爲父王說念佛

正教

寶積經云。世尊父王。頂禮佛足。一心合掌。而白佛言。云何修行。當得諸佛之道。佛言。一切衆生。皆卽是佛。汝今當念西方世界。阿彌陀佛。常勤精進。當得佛道。王言。一切衆生。云何是佛。佛言。一切法無生。無動搖。無取捨。無相貌。無自性。可於此佛法中。安住其心。勿信於他。爾時父王。與七萬釋種。聞說是法。信解歡喜。悟無生忍。佛現微笑。而說偈曰。釋種決定智。是故於佛法。決定心安住。人中命終已。得生安樂國。面奉阿彌陀。無畏成菩提。

善財五十三參首見德雲比丘說念佛門

正教

華嚴經入法界品云。德雲比丘。告善財言。善男子。我
 得自在決定解力。信眼清淨。智光照耀。普觀境界。離
 一切障。具清淨行。往詣十方。供養諸佛。常念一切諸
 佛如來。總持一切諸佛正法。常見一切諸佛。隨諸眾
 生種種心樂。示現種種成正覺門。於大眾中。而師子
 吼。善男子。我惟得此憶念一切諸佛境界智慧光明
 普見法門。所謂智光普照念佛門。令一切眾生念佛
 門。令安住力念佛門。令安住法念佛門。照曜諸方念
 佛門。入不可見處念佛門。住於諸劫念佛門。住一切
 時念佛門。住一切刹念佛門。住一切世念佛門。住一

切境念佛門。住寂滅念佛門。住遠離念佛門。住廣大
 念佛門。住微細念佛門。住莊嚴念佛門。住能事念佛
 門。住自在心念佛門。住自業念佛門。住神變念佛門。
 住虛空念佛門。

智首菩薩說念佛正教

華嚴經云。一切威儀中。常念佛功德。晝夜無暫斷。如
 是業應作。

龍樹大士勸念佛正教

大智度論云。佛是無上法王。諸大菩薩為法臣。諸臣
 所尊重者。惟佛法王。是故菩薩應當念佛。又云。有諸

菩薩自念往昔。謗般若。墮惡道。經無量劫。雖修餘行。未能得出。後遇善知識。教行念佛三昧。即得併遣罪障。方得解脫。又偈云。若人願作佛。心念阿彌陀。即時為現身故。我皈命禮。

念佛功德有七種勝正教

甘露疏云。一詞少易行勝。惟稱一句南無阿彌陀佛。一切人可念故。二念緣佛境勝。一心緣念佛身相好。淨國為境故。三離難獲安勝。諸佛菩薩加護念佛者。無諸患難。安慶吉祥。四稱名滅罪勝。念佛一聲。滅八十億劫生死重罪。五持念獲福勝。稱佛一聲。勝四天。

下七寶。供佛及阿羅漢。六果感見佛勝。眾生念佛。必定見佛。七親迎往生勝。化佛菩薩放光迎接。行者往生佛土。

修持法門正教

夫無為境界。過絕名言。有漏色心。要憑修證。真如具含眾德。方便而有多門。上自離相平等。下至十念稱名。總括不離三乘。往生冥符九品。有念終歸於無念。有生直至於無生。可謂一句彌陀。羣機普應矣。

離相念佛三昧無住法門正教

慈照宗主云。離相念佛三昧者。上根智人。悟此深理。

蓮宗寶鑑卷二
常運虛空平等心。無我人衆生壽者相。經云。離一切諸相。卽名諸佛。論曰。我以計內。人以計外。衆生以續前爲能壽者。以續後爲義。旣無內外前後執心。則一切諸相悉皆空寂。故經云。知無我人。誰受輪轉。亦無身心。受彼生死。是名離相念佛三昧。此則見一切衆生本性。皆同彌陀。旣不執有相無相二邊。亦無有斷見常見之說。由是念念彌陀出世。處處極樂現前。如此念者。無念之念。念則眞如。無生之生。生則實相。故知無念卽離念。實相乃無相。無相則無住。無住則入佛境界。此乃無上正眞大菩提道。若到此地。無修無

證。無生死可脫。無涅槃可求。性相俱空。聖凡齊等。無佛道可成。無衆生可度。無己靈可得。一念無爲。十方坐斷。無一法本有。無一法始成。自他互收。事理無礙。塵塵具足。刹刹全彰。法本如然。思議莫及。可謂十方薄伽梵。一路涅槃門。

空觀念佛三昧無念法門

正教
八

空觀念佛三昧者。卽祖師序云。思專想寂。志一不撓。氣虛神朗。無幽不徹。入斯定者。昧然忘知。塵累頓消。滯情融朗。非天下至妙。孰能與於此哉。智者大師。以空觀而蕩一切法。故云。一空一切空。無假無中而不

空入此觀者是審實真諦也。今欲令行人反妄歸真。故謂之從假入空觀。蓋假者是入空之詮。先觀一切法是假。乃至四大五蘊六根六塵六識。盡十方世界山河大地。皆無一物。了知虛妄。而得會真。故名二諦觀。修此者。先要攝心靜坐。將世間一切虛妄不實境界。盡情掃蕩。俱不住着。惟觀於空。故般若經云。內空外空。內外空空。空空亦不可得。如是頓入如來寶明空海。性覺真空。卽如來藏。空性圓明。靈光遍照。法界性故。如摩尼珠。隨意出生。如大溟海。深廣含攝。平等性智。名佛知見。可謂諸行無常。一切空。卽是如來大

圓覺。

日觀念佛三昧專想法門 正教九

觀無量壽佛經云。佛告韋提希。汝及衆生。應當專心繫念一處。想於西方。凡作想者。一切衆生。自非生盲有目之徒。皆見日沒。當起想念。正坐西向。諦觀於日。令心堅住。專想不移。日欲沒時。狀如懸鼓。旣見日已。開目閉目。皆令明了。是爲日想。名曰初觀。行人入此觀者。須於靜處。屏絕外緣。正坐攝心。諦觀日輪。現在目前。注心一境。凝然寂靜。如對明鏡。自覩面像。心若馳散。制之令還。心息住定。卽得三昧。可謂海底金烏

天上日。眼中瞳子面前人。

參禪念佛三昧究竟法門

正教

遠祖師禪經序云。禪非智無以窮其寂。智非禪無以深其照。禪智者。照寂之謂。其相濟也。照不離寂。寂不離照。感則俱遊。應則同趣。慈照云。寂而常照。照而常寂。常寂常照。名常寂光。念佛之人。欲參禪見性。但依此法。要於靜室。正身端坐。掃除緣累。截斷情塵。瞪開眼睛。外不着境。內不住定。回光一照。內外俱寂。然後密密舉念南無阿彌陀佛三五聲。回光自看云。見性則成佛。畢竟那箇是我本性阿彌陀。却又照覷看只

今舉底這一念。從何處起。覷破這一念。復又覷破這一念。底是誰。○參良久。又舉念南無阿彌陀佛。又如是覷。如是參。急切做工夫。勿令間斷。惺惺不昧。如雞抱卵。不拘四威儀中。亦如是舉。如是看。如是參。忽於行住坐臥處。聞聲見色時。豁然明悟。親見本性彌陀。內外身心。一時透脫。盡乾坤大地。是箇西方。萬象森羅。無非自己。靜無遺照。動不離寂。然後興慈運悲。接引未悟。悲智圓融。入無功用行。得生上品。名實報莊嚴土。得一切種智。可謂萬古碧潭空界月。再三撈漉始應知。

攝心念佛三昧調息法門 正教十一

大集經賢護品云。求無上菩提者。應修念佛禪三昧。偈云。若人專念彌陀佛。號曰無上深妙禪。至心想像見佛時。即是不生不滅法。坐禪三昧經云。菩薩坐禪。不念一切。惟念一佛。即得三昧。初機修習。未免昏散二病。須假對治。人天寶鑑云。凡修禪定。即入靜室。正身端坐。數出入息。從一數至十。從十數至百。百數至千萬。此身兀然。此心寂然。與虛空等。不煩禁止。如是久之。一息自住。不出不入。時覺此息。從毛孔中。入萬四千雲蒸霧起。無始已來。諸病自除。諸障自滅。自然

明悟。譬如盲人。忽然有眼。爾時見徹。不用尋人指路也。今此攝心念佛。欲得速成三昧。對治昏散之法。數息最要。凡欲坐時。先想已身。在圓光中。默觀鼻端。想出入息。每一息默念南無阿彌陀佛一聲。方便調息。不緩不急。心息相依。隨其出入。行住坐臥。皆可行之。勿令間斷。常自密密行持。乃至深入禪定。息念兩忘。即此身心。與虛空等。久久純熟。心眼開通。三昧忽爾現前。即是唯心淨土。

一相念佛三昧專念法門 正教十二

大般若經云。曼殊室利白佛言。菩薩修行何法。疾證

蓮宗寶鑑卷二
無上菩提。佛言。菩薩能正修行一相莊嚴三昧。疾證
菩提。修此行者。應離喧雜。不思衆相。專心繫念。於一
如來。審取名字。善想容儀。卽爲普觀三世一切諸佛。
卽得諸佛一切智慧。天台十疑論云。一切諸佛。悉皆
平等。但衆生根鈍。濁亂者多。若不專心。繫念一佛。則
心散漫。三昧難成。故專令念阿彌陀佛。卽是一相三
昧。寶王論云。修持一相念佛三昧者。當於行住坐臥。
繫念不忘。縱令昏寐。亦繫念而寢。覺卽續之。不以餘
業間斷。不以貪嗔等間隔。隨犯隨懺悔。不隔念不異
念。不隔日。不隔時。念念常不離佛。念念清淨圓明。卽
是得一相三昧也。可謂是若了一萬事畢。

六時念佛功德回向法門

正教
十三

遠公祖師。東林結社。僧俗同修。大智上賢。深入禪觀。
得念佛三昧。中流之士。六時修禮淨土。回向西方。唐
有詩云。遠公獨刻蓮華漏。猶向山中禮六時。凡修此
法。先於淨室。安置佛像。香花燈燭。隨分供養。澡浴塵
垢。着清淨衣。每日於日初時。日中時。日沒時。夜初時。
夜半時。夜終時。自對三寶。端身合掌。信禮西方。每一
時。目覩慈容。稱念南無阿彌陀佛聖號一千遍。禮佛
四十八拜。念西方文發願回向。每日晝三夜三。六時

蓮宗寶鑑卷二
行道精專不倦。志意修持。堅固行願。淨業圓成。他日必得中品中生矣。

補錄蓮宗八祖蓮池大師西方發願文

稽首西方安樂國。接引衆生大導師。我今發願願往生。唯願慈悲哀攝受。弟子某甲普爲四恩三有法界衆生。求於諸佛一乘無上菩提道。故專心持念阿彌陀佛萬德洪名。期生淨土。又以業重福輕障深慧淺。染心易熾。淨德難成。今於佛前。懇勤五體。披瀝一心。投誠懺悔。我及衆生。曠劫至今。迷本淨心。縱貪嗔癡染穢三業。無量無邊。所作罪垢。無

量無邊。所結冤業。願悉消滅。從於今日。立深誓願。遠離惡法。誓不更造。勤修聖道。誓不退惰。誓成正覺。誓度衆生。阿彌陀佛。以慈悲願力。當證知我。當哀愍我。當加被我。願禪觀之中。夢寐之際。得見阿彌陀佛。金色之身。得歷阿彌陀佛寶嚴之土。得蒙阿彌陀佛。甘露灌頂。光明照身。手摩我頭。衣覆我體。使我宿障自除。善根增長。疾空煩惱。頓破無明。圓覺妙心。廓然開悟。寂光真境。常得現前。至於臨欲命終。預知時至。身無一切病苦厄難。心無一切貪戀迷惑。諸根悅豫。正念分明。捨報安詳。如入禪

定。阿彌陀佛與觀音勢至諸聖賢衆。放光接引。垂
手提攜。樓閣幢幡。異香天樂。西方聖境。昭示目前。
令諸衆生。見者聞者。歡喜感歎。發菩提心。我於爾
時。乘金剛臺。隨從佛後。如彈指頃。生極樂國七寶
池內。勝蓮華中。華開見佛。見諸菩薩。聞妙法音。獲
無生忍。於須臾間。承事諸佛。親蒙授記。得授記已。
三身四智。五眼六通。無量百千陀羅尼門。一切功
德。皆悉成就。然後不違安養。回入娑婆。分身無數。
徧十方刹。以不可思議自在神力。種種方便。度脫
衆生。咸令離染。還得淨心。同生西方。入不退地。如

是大願。世界無盡。衆生無盡。業及煩惱。一切無盡。
我願無盡。願今禮佛發願。修持功德。回施有情。四
恩總報。三有齊資。法界衆生。同圓種智。

懺罪念佛功德繫念法門

正教
十四

大彌陀經云。我作佛時。十方無央數世界。諸天人民。
聞我名號。燒香散花。燃燈懸繒。飯食沙門。起立塔寺。
齋戒清淨。益作諸善。一心繫念於我。雖止於一晝夜。
不絕。亦必生我刹。不得是願。終不作佛。又云。我作佛
時。十方無央數世界。諸天人民。以至蜎飛蠅動之類。
前世作惡。聞我名號。卽懺悔爲善。奉持經戒。願生我

刹壽終皆不經三惡道徑遂往生一切所欲無不如意不得是願終不作佛凡修持者先當嚴淨壇場燒香燃燈廣設供養請一比丘及諸上善人同壇尊證白佛陳意絕慮去憂勿預家事勿近內人齋戒修持繫念彼佛名號一晝一夜每佛一千聲誦彌陀經一卷如是三次志心懺悔回向云我今自憶有生以來造諸惡業願此念佛功德得入如來大誓海中承佛慈力眾罪消滅冤尤釋除三業所生一切諸善莊嚴淨願福智現前願得臨命終時自知時至身無病苦心不顛倒如入禪定於一念頃徑生西方極樂國土見佛接引於七寶池中蓮華臺上蒙佛受記得聞經法頓開佛慧廣度眾生滿菩提願可謂水向石邊流出冷風從花裏過來香。

晨昏念佛功德信願法門

正教十五

在家菩薩奉佛持戒逐日營辦家緣未能一心修行者須是早起焚香參承三寶隨意念佛每日黃昏亦如是禮念以爲常課如或有幹失時次日當自對佛懺既此之法門要且不妨本業爲士者不妨修讀爲農者不妨耕種爲工者不妨作務爲商者不妨買賣晨參夕禮之外更能二六時中偷那工夫持念佛號

百聲千聲。志誠爲功。期生淨土。回向云。弟子某禮念功德。願命終時。徑生淨土。蓮華池畔。親見彌陀。寶樹行中。相逢善友。普爲父母師長。法界衆生。同滿此願。可謂積塵成巨嶽。滴水漸成河。

簡徑念佛功德十念法門

正教十六

慈雲式懺主云。在俗人塵務忙冗。每日清晨服飾已。面西合掌。念南無阿彌陀佛。盡一口氣爲一念。如是十念。但隨氣短長。氣極爲度。其念佛聲不高不低。調停得中。如此十念連續不斷。意在令心不散。專精爲功。顯是藉氣束心也。回向云。某一心皈命西方阿彌

陀佛。願以淨光攝我。我今稱如來名。經十念頃。求生西方。佛昔本誓。若有衆生。欲生我刹。十念我名。若不顛倒。於一念頃。生極樂國。聞佛妙法。速證菩提。可謂信心如不退。決定禮金僊。

慈照宗主圓融四土選佛圖序

正教十七

夫寂光同居。一智無殊。情生彼此。見有親疎。覲面了色。空性如如。本無二路。自見妙麗。吾不如是。一體毘盧。先須識本。免被茶糊。行有行相。智有智模。願有願力。進有程途。惺惺寂寂。如淨明珠。照徹心體。凡聖同

凡聖同居土

三光具足



如廡序出身

凡聖情差智有殊
 須憑修證契毘盧
 恐人易一行疲倦
 權指西方住半途
 橫出三界少人知
 易修易往勿狐疑
 塵垢未除求解脫
 一心信願念阿彌
 臨終正念分明去
 三朝七日預知時
 既生淨土常聞法
 何愁不得悟心機

願	三	宗	勝	情	具	十	橫	須	陀	洹	八	凡
不	德	用	劣	見	煩	成	出	及	其	人	之	尺
退	迷	體	應	除	惱	就	三	天	所	見	身	居
						生	界					

此土但有信願念佛。不斷煩惱。不捨家緣。不修禪定。臨命終時。彌陀接引。皆得往生淨土。便獲神通。得不退轉。直至菩提。凡聖同居土者。乃自他受用。三光具足。總攝四土。九品化生。據理後三土。皆在其中。不別出而祇引下下品者。蓋祖師明其易修易往也。其餘品位高低。各隨行願修證而成也。

方便有餘土



如邊功出身

如星之光

斷除煩惱絕蹤由其
滅智灰心便罷休
寶所不能前進步
如來方便故相留
豎出三界聲聞性
煩惱塵勞急斷除
入定四禪頻觀鍊
永超凡世不還歸

行	不	退
解	脫	德
體	用	宗
勝	應	身
一	切	智
破	見	惑
入	關	生
豎	出	界
四	聞	等
果	弟子	所
聲	子	見
丈	六	身
羅	漢	居

此土皆是定性小乘根性。怕怖三界。如虎鬼龍。蛇。破見思惑。殺貪嗔癡。斷如來種。如獐獨跳。不顧後羣。偏執小見。沉空滯寂。生方便土。如來純說大乘調伏。

實報莊嚴土

如月之光



如科選出身

心法微微猶未遣
應知情盡始除根
貼肉汗衫既未脫
纖塵猶礙大乾坤
非橫非豎理偏宜
三觀澄心進莫疑
一力未能超彼岸
依然還落聖賢機

退	不	智
德	若	般
體	宗	用
身	報	圓
智	種	道
無	分	破
明	破	塵
生	備	三
界	出	非
居	薩	苦
好	千	萬
所	及	補
見	諸	處
	大	一
	士	生

此土皆是大乘圓修三觀十住十行十向十地


等覺法身大士如塵若沙各各分破無明分身

十方八相成道度脫衆生皆未究竟天台賢首

教委明

常寂光淨土

如 日 之 光



如灌頂王子出身

境智如如絕證修

更無閑事滯心頭

情盡見除消息斷

一輪明月掛中秋

衝關透頂不思議但於當

念絕思惟唯心淨土唯心

淨直下承當第一機智開

惑破無煩惱返本還源獨

自知無心身滿塵沙界任

運攝將諸子歸

位 法 宗

清 一

破 一

衝 無

諸 法

果

不 身 體

淨 切

三 念

關 土

佛 界

人

退 德 用

身 智

盡 生

頂 真

見 身

居

法 種

惑 不

透 正

所 界

人

此土是寂上乘境界。惑盡情忘。諸法不生。般若
不生。不生不生。名大涅槃。究竟居涅槃山頂。端
居常寂光土。名清淨法身毘盧遮那佛。名到彼
岸。亦名空劫以前自己也。


東方四土



四土非方域
情生礙不通
悟迷分大小
淨穢隔西東
萬有形雖別
千機理自同
春風俱一拂
何處不花紅

大小始終無改
小見九品差殊
上智祇在一心
下智東西隔礙

西方四土




莫謂西方遠西方在
目前雖云越十萬曾
不離三千念佛纔開
口華池已種蓮信心
如不退決定禮金仙

西方是取相欣厭二
門修若人從此入得
一切處皆淨土

阿鼻依正全處極聖之自身。心土毘盧不逾下凡之
一念智者云。豈離伽耶。別求常寂光土。須知毘盧遮
那徧一切處。善觀心者。一切萬法。惟心本具耳。


觀 心 四 土

夫終日寂光而未常寂光者凡夫也欲證寂光而未極寂光者菩薩也具足寂光而住持寂光者如來也常寂光淨土是離相心若到此地見一切處皆常寂光



欲識天真佛
從來絕證修
不須外尋覓
但向自心求
悟後三身合
迷時四不周
莫生分別見
直下息心休


西 方 四 土



恆 沙 四 土



一心 四土



圓融 四土

目前 四土



三 諦 四 土
 從來四土本無宗
 萬象森羅空不空
 莫落偏邪妄分別
 土土分明空假中

相 卽 四 上

體宗及用三相卽
 舉一卽三三是一
 鼎分三足一不虧
 日月星光幾曾失

迷悟 四土

凡聖尊卑體一同
 情差隔碍不融通
 悟則四皆全體現
 迷來一土不知踪

人人 四土

四土人人皆悉有
 從來迷妄不能知
 今朝指出分明示
 勸汝承當不可遲

絕待 四土

四土橫論及豎論
 更無纖芥可留存
 若了州城元是郭
 三家村裏不曾村

教是佛眼。禪是佛心。心若無眼。心無所依。眼若無心。眼無所見。心眼和合。方辨東西。禪教和融。善知通塞。當知機有利鈍。法有開遮。若定作一路收機。都成謗法。四門入郭。都至府前。四土修心。各登彼岸。聽教之士。不可偏邪。參禪之流。應如是會。權實方便。運用在人。惟宜事理融通。不可執法而成病。○聞思修三慧。戒定慧三學。各要反本還源。盡欲革凡成聖。今人不了。各執一邊。只說教不通禪。禪不通教。本爲去執。反屬偏情。平等修心。卻生分別。禪云。黃花翠竹。總是眞如。教云。一色一香。無非中道。勢至菩薩。因念佛。故自

蓮宗寶鑑卷二
三
得心開。智者大師誦法華經。得見眞法。是處各存妙道。豈在喧爭。今要凡心與身土和融。念佛與禪教一道。入門雖別。到底是同。休起愛憎。莫分彼此。各須究本。勿競枝條。不可執實而謗權。競權而謗實也。

清涼國師云

塵勞業海

結惑堅執

情盡見除

不勞收拾

夫法報應之三身。寂光同居四土。各要歸源。咸廻一路。一身三身。四土一土。非後非前。無來無去。情見有差。非佛隱覆。祇許心傳。不通言句。周徧圓融。無盡無窮。一眞無礙。重更重重。帝珠莫喻。梵網難同。撥轉機關。入達四通。不在伶俐。唯假惺惺。毘盧得道。許汝便成。永絕生死。卽放光明。若不擬議。海晏河清。

一土分四土

土土各三身

身土無有盡

情見恰如星

如來無礙力

似月在天輪

州州皆見月

處處有光明

後頌

大道通天下

明明幾百州

州州各道路

路路合春秋

迷後三身別

悟來一也休

這般無彼此

莫把結怨讎

念佛提綱

本自無蹤無跡

方便與君拈出

有人問我何爲

南無阿彌陀佛

念佛心開

因修三昧念彌陀
始覺行行皆寶所

忽觀彌陀心上過
方知土土悉交羅

禪教相成

天台賢首慈恩教
法門頭數無窮盡

達磨南山意不殊
不離毫端絕妙麗

三身體同

三德秘藏及三身
處處融通無罣礙

舒卷臨機分不分
勿教一向作三人

三寶不異

佛法僧寶最為真

豈異而今一點靈

舉一卽三三是一

莫教錯認定盤星

身土不二

毘盧卽是寂光土
身土本來無二相

寂光卽是大毘盧
皇城原是大京都

心佛無殊

此心卽是彌陀佛
皆道蟾光有虧減

彌陀卽是自心源
誰信從來日日圓

絕跡無相

一念圓明法界周
若也此中明了得

免向三祇着劫修
一點微塵也不留

情盡宛然

毘盧海藏全無迹

劫火洞然毫末盡

頭頭見道

寂光金寶及泥沙

了得箇中玄妙意

處處逢源

心心念念彌陀佛

微塵刹海如星布

廬山蓮宗寶鑑卷二

寂光妙土亦無蹤

青山依舊白雲中

到處無心便是家

優曇元是白蓮華

頭頭處處古毘盧

撮在山僧一畫圖

廬山蓮宗寶鑑卷三

東林蓮宗善法祖堂勸修淨業臣僧普度謹編

念佛正宗篇第三

念佛正宗說

下具八章

明教大師曰。能仁之垂教也。必以禪為宗。而佛為祖。祖者乃其教之大範。宗者乃其教之大統。大統不明。則天下不得一其所詣。大範不正。則天下不得質其所證。夫古今之學佛輩。競以其所學相勝者。蓋由宗不明。祖不正。而為患。然非其祖宗素不明不正也。後世學者。不能盡考經論而校正之。乃有東教者。不知

佛之微旨。妙在乎言外。諸禪者。不諒佛之所詮。槩見乎教內。紛然自相是非。古今何嘗稍息。予嘗探大藏。或經或傳。檢驗其所謂禪宗者。佛祖之心也。佛說一大藏教。未嘗不以心爲宗也。嗟乎衆生之根器異也。又安得以一法而明之。我佛平等設化。於是對其病。而投其藥耳。且夫淨土一宗。念佛之法。有實有權。有頓有漸。皆以顯如來所證之實理。廓衆生自性之本源。以念佛三昧攝一切人。明心見性。入於佛慧。或問之曰。念佛其可明心見性。入佛慧乎。予謂之曰。心爲萬法之宗。操之在我。則何道不成。大勢至菩薩以念

佛證無生忍。究其因地。純於念佛上用功。念念無間。打成一片。所以道都攝六根。淨念相繼。得三摩地。斯爲第一。蓋佛者心也。念佛念心。心心不二。心既不二。佛佛皆然。一念貫通。無前後際。三際俱斷。是真道場。塵塵顯示。刹刹全彰。是謂入於如來正徧知海。具足如來一切種智。念佛之旨。大略如斯。遠公祖師得是三昧。而以此三昧示一百二十三人。同修同證。思專想寂。以至究竟。吾祖於是深存遠圖。大援羣生。且以晉地新經未來。禪法甘露。國所未聞。實相宗本。人有異說。乃命弟子踰越葱嶺。遠迎禪師。究尋經本。故明

教大師定祖圖云。秦僧智嚴於罽賓國。懇請跋陀羅偕來。諸夏傳授禪法。初至長安。後至廬山。遂出禪經。與遠公同譯。譯成。遠公爲之序。跋陀羅嘗謂遠公曰。西土傳法祖師。自大迦葉直下相承。凡有二十七祖。其二十六祖。近世滅度。名不如蜜多者。所以繼世。弟子曰。般若多羅。方在南天竺國行化。以此慧燈。次第相傳。達磨多羅。後爲二十八祖。我今如其所聞。而說是義。遠公聞跋陀羅言。故序云。達磨多羅。西域之雋。禪訓之宗。寶林傳所謂跋陀羅常與遠公言其傳法諸祖世數。固驗於禪經矣。故張野序遠公塔銘云。心

禪諸經。出自廬山。師每謂禪法精微。非才莫授。功高易進者。惟念佛一門。導之以止觀。專之以淨業。此假修以凝神。積習以移性。入於如來無盡法門。實由斯矣。故此淨土之教。至於天台智者大師。乃示三觀。證乎一心。總結三乘之要行。普收五性之機宜。直付觀行之真財。悟入如來之知見。故知念佛之要者。由觀經爲標指也。斯經以佛國淨境爲宗。以契者妙行爲趣。以實相彌陀爲體。以滅惡生善爲用。是知無量功德。共莊嚴之。種種勝行而歸趣之。言說問答。而詮辨之。譬衆星之拱北辰。如萬流之朝東海也。是故韋提

不經地位。頓證無生。五逆十念稱名。便登極樂。卽圓頓教之所攝也。此之念佛三昧法門。權實頓漸。折攝悟迷。圓攝一切。會歸真宗。猶車之有輪。如鳥之有翼。入道之由。可謂至矣。可謂盡矣。是以集夫正受之方。示彼修行宗要。開明心目。直指根源。庶使念佛進修之士。明其宗而不昧其祖也。若夫一句當機。淨土唯心顯矣。

定明宗體

正宗

慈恩通贊云。此方先德。總判經論。有其四宗。一立性宗。二破性宗。三破相宗。四顯實宗。涅槃華嚴法華等。

是顯於真實中道義。故捨化城而歸寶所等。故彌陀經乃第四宗也。依文判教。教但有三。以類准宗。宗有其八。一我法俱有宗。二有法無我宗。三法無去來宗。四現通假實宗。五俗妄真實宗。六諸法但名宗。七勝義皆空宗。八應理圓實宗。故華嚴及彌陀經。是八宗收。

李長者華嚴合論十種淨土權實

正宗

夫滔滔智海。茫茫莫究其涯。淼淼真源。蕩蕩罕尋其際。遮那法界。體相總括於塵沙。方廣靈門。淨穢互參於無極。但隨現修業用。見境不同。致使聖境乖違。依

根不定。或權分淨土於它國。指穢境於娑婆。或此處爲化儀。示上方爲實報。文殊居東國。金色世界而來。觀音處西方安樂妙土而至。如是權儀各別啟蒙的。信無依。今以略會諸門。令使創修有托。約申十種。以定指南。

第一阿彌陀佛淨土。此爲一分取相凡夫。未信法空實理。以專憶念。念想不移。以專誠故。其心分淨。得生淨土。是權未實。

第二無量壽觀經淨土。此爲一分未信法空實理衆生。樂妙色相者。令使心想。想彼色像。想成就故。而生

佛土。此權非實。

第三維摩經淨土。佛以足指按地。加其神力。暫現還無。是實報土。未具陳廣狹。是實未廣。

第四梵網經淨土。雖說一大華王。而有千葉。一一葉上。有百億化佛。教化百億四天下衆生。然彼千葉及彼華王。爲三乘菩薩。見未廣故。分示報境。未成圓滿。是權未實。

第五摩醯首羅天淨土。如來於彼坐蓮華座。成等正覺。以爲實報。此閻浮提摩竭提國。菩提場中。成等正覺者。是化此爲三乘權教菩薩。染淨未亡者。說此閻

浮提及六天等。是欲界有漏。彼上界摩醯首羅天。是無漏故。心存染淨。彼此未忘。此爲權教。未爲實說。第六涅槃經所指淨土。如來有實報淨土在西方。過二十二恆河沙佛土者。爲三乘權教。一分染淨未亡者。言此三千大千世界。總是穢土。權推如來報境淨土在西方。此權非實。

第七法華經三變淨土。此爲三乘權教菩薩染淨未亡者。言移諸天人。置於他土。是權非實。

第八靈山會所指淨土。此引三乘中權教菩薩染淨未亡者。令知此土卽穢卽淨。諸衆信可未能自見。是

實非權。

第九唯心淨土。自證自心。當體無心。性惟眞智。不念淨穢。稱眞任性。心無罣礙。無貪無癡。任大悲智。安樂衆生。是實淨土。以自淨故。令他亦淨。是故維摩經云。隨其心淨。卽佛土淨。欲得淨土。當淨其心。是實淨土。第十毘盧遮那所居淨土。卽居十佛刹蓮華佛國土。淨穢總含。無穢無淨。無有高下彼此自他之相。一一佛土。皆充法界。無相障隔。略言十佛塵刹國土。爲知無盡佛國。不出一塵。爲無大小故。不立限量故。以法爲界。不限邊際。相海純雜。色相重重。此實淨土。非是

權收

悟開曰。棗柏所論十種淨土權實。未達其旨者。輒將西方淨業。輕之忽之。何以故。爲是權教也。殊不知權實之爲義。實無優劣。不明體用之妙理。但橫生妄計耳。况棗柏因據華嚴經判教而云然。至其所稱一分取相凡夫。未信法空實理。誠哉是言也。當知取相者。取淨穢之相也。一切凡夫。從生至死。純取穢相。甚至造種種惡業。此是取穢相之尤者。所以輪轉三途。而無休息。如來憐憫衆生之苦。思惟濟度。若遽以真空實相

之理示之。雖極暢本懷。衆生障重智闇。何能信受。修學。只得隱其實說。且教捨穢取淨。先脫落果未。三界之苦。此其所謂權也。此權實二字。原在衆生分上說。而不在如來處也。亦不在乎經教處也。奈何不達其旨。但隨語生解。計優計劣。毀謗如來正法。我今且順棗柏所判權實明之。若夫西方淨業。本是三根普被。權實雙融。徹上徹下之法門。權收中下。實收上根。此論中稱唯心淨土是實。非權。而念佛至一心不亂。深達妙理。非唯心而何。此西方淨業。豈非又稱實教耶。茲寶

鑑所採棗柏之論。淨土權實益證蓮宗之深義矣。

念佛參禪求宗旨說正宗三

慈覺願禪師云。念佛不礙參禪。參禪不礙念佛。法雖二門。理同一致。上智之人。凡所運為。不着二諦。下智之人。各立一邊。故不和合。多起紛爭。故參禪人破念佛。念佛人破參禪。皆因執實。謗權。執權。謗實。二皆道果未成。地獄先辦。須知根器深淺。各得所宜。譬如營田人。豈能開庫。開庫人。安可營田。若教營田人開庫。如跛足者登山。若教開庫人營田。似壓良人為賤。終

無所合也。不若營田者。且自營田。開庫者。且自開庫。各隨所好。皆得如心。是故念佛參禪。各求宗旨。溪山雖異。雲月是同。可謂處處綠楊堪繫馬。家家門首透長安。

淨土非鈍根權說正宗四

天台思梵講主。久居臨平山。解行明峻。深造教觀。性相淵源。每與士大夫往復。隨有所問。荅釋粲然。一日有通判鄭公。問曰。教中所明念阿彌陀佛。願生淨土。此專為鈍根。方便權說。上根頓悟。一超直入佛地。豈假他佛淨土耶。師云。吾宗先達呵此說云。佛在世文

殊普賢佛滅後馬鳴龍樹。此土智者大師。智覺禪師。皆願往生淨土。應是鈍根乎。若以此爲權教。將何爲實耶。昔孫莘老亦疑於此。因會楊次公王敏仲辯論。遂息此疑。信此淨土。非聖人之權設。是圓實之眞宗也。注念彼佛。必生淨土。斯乃稱性實言。非權教也。

眞歇了禪師淨土宗要

正宗五

彌陀不離衆生心。是三無別。極樂遍在一切處。舉一全收。如帝釋殿上千珠寶網。千珠光影。咸入一珠。一珠光影。徧入千珠。雖珠珠互徧。此珠不可爲彼珠。彼珠不可爲此珠。參而不雜。離而不分。一一徧彰。亦無

方所。彌陀淨土。卽千珠之一。十萬佛國。卽一佛國。各千珠之一。聖人善巧方便。示人專念阿彌陀佛。乃千珠直指一珠。見一佛卽見十方諸佛。亦見九界衆生。微塵刹海。十際古今。一印頓圓了無餘法矣。

寂室大師示淨土實見

正宗六

不修淨業者云。游心禪定。悟性眞宗。或聞說淨土。必曰淨土唯心。我心旣淨。則國土淨。何用別求生處。寂室曰。且維摩經中云。如來以足指按地。見娑婆國土。悉皆嚴淨。而衆會不見。惟螺髻梵王得知。今之說悟性者。能如梵王所見淨土不。况汝居卑室漏者。必羨

之以大厦高堂。脫粟藜羹者。必羨之以珍羞上味。敝袍短褐者。必羨之以綾羅輕縠。若云心淨土淨。則不消如是分別也。况當老病死苦。世間違情之時。顏色與未悟者同。是則口唱心淨土淨之言。身被穢土苦惱之縛。其自欺之甚也。不然。應須信教仰理。於淨土從而修之。

大智律師示念佛事理不二正宗七

師嘗為慈慧文法師作淨土集序。其略曰。古今學佛多惑事理。謂理則纖塵不立。言事則萬象森羅。疑心住寂。則為理。動用操修。則為事。遂引古云。實際理地。不受一塵。佛事門中。不捨一法。斯廼理事敵立。空有並馳。予嘗變其語曰。實際理地。不少一塵。佛事門下。不存一法。何則。由實際理具一切法。豈少一塵乎。由佛事門離一切相。豈存一法乎。如此方見理事一如。空有不二矣。

文法師淨行序念佛宗要正宗八

夫達無心之有心。識有念之無念。有無不住。能所胡存。是則念念圓明。心心虛寂。苟昧斯旨。則法法成疣。的契其宗。則門門通妙。今可無乖實際。而示圓修。俾負重至遠者。獲遂於息肩。流浪迷津者。速登於彼岸。

求生西方。無先念佛觀門者也。予輒為修淨業者。薄探經論大綱。述成西方淨行法門。示彼所修。令得其趣。有觀茲文。而復不能起信修行者。煩乎狂熱投圓。唯露一髮。欲垂拯救。末如之何。

廬山蓮宗寶鑑卷三

音釋

雋 徂充切 肥肉也

信士賀啟元 信女陳門潘氏各助洋拾元敬刻

第二第三兩卷惟願現增五福他報九蓮

